



焦太史編輯國朝獻徵錄卷之七十五目錄

順天府

府尹

王賢

陳諤

蘭琦

劉淑相

查秉彝

府丞

周璽

景濤

應天府

府尹

鄭沂

薛均

張璘

彭信

魯崇志

秦崇

高敞

于冕

吳雄

冀綺

孫春

王宸

陳錫

王震

柴奇

孫懋

唐寬

府丞

楊潔

治中

龐嵩

通判

林春

呂言

祝允明

目錄終

刊行

焦太史編輯國朝獻徵錄卷之七十五

順天府

府尹

順天府尹王公賢墓志銘

姚夔

公諱賢字惟善其先通州人曾大父璿仕元僉樞密院事大父成任虞城尹贈通議大夫順天府尹父友直贈戶科給事中加贈通議大夫順天府尹當元季擾攘避兵山東及我大明定天下遂占籍寧陽公生而岐嶷體態與恒兒異少長讀書潛心問學遂以詩經領永樂辛卯鄉薦登乙榜授鄢陵教諭學久廢

弛公振勵而作興之然必以身爲教嚴條約程課業
不易寒暑又言於有司新學宮飭廟祀煥然一新士
咸知向學多所造就焉今戶部尚書張睿前禮部侍
郎兼翰林學士薛瑄皆其高第弟子也秩滿擢戶科
給事中進光祿少卿奉 勅淮揚巡視民瘼著廉幹
聲用是 上知其才遂有府尹之命輦轂之下兵民
雜處權勢縱橫公不剛不柔爬奸剔蠹一處以公道
人見公言動尊嚴亦不敢以非禮干吏民大化之嘗
以柴炭爲民病語工部石尚書曰京民勞疲極矣今
採運夫役與真保諸郡等無乃不可乎石默然爲通
減之又惜薪中貴縱其下非法凌府屬叱跪於庭熒
火圍之公聞趨至縛其人欲以聞主者溫言謝乃釋
去一日坐公堂有懸金牌直入稱權勢官索板席若
干公曰明日來取察知其詐及至執之寘於法其處
事多類此九載滿表乞致仕 上不許陞正二品俸
復任又三載再疏乞骸骨 上曰卿年七十禮當致
仕然京畿冗繁非爾不治所請不允 英宗皇帝復
辟之初顧謂近臣曰府尹如賢者何可得哉至是公
年七十有三上章引疾力辭得請卽日上道士民攀
援塞途戀戀不忍舍去公在任嘗修府治學校及宋

文丞相祠事集而民不擾苟有可省卽省之惟恐累於民故民德之深如此成化改元用恩例進階一級授從二品階中奉大夫生洪武乙丑六月二十三日卒成化三年五月三日年八十有三卒之日鄉人無老少皆奔走哭焉公仕內外四十年所至以勤慎稱非義一毫無所取且宅心忠恕待人不設勾絞故人佩其德而欽服焉自休官歸田里十年絕不以勢利關心恒與致仕翰林學士許道中優游徘徊於山岨水曲之間吟風弄月澹如也老子曰功成名遂身退天之道也公蓋得之矣

順天府尹陳諤傳

雷禮

陳諤字克初字一諤廣東廣州府番禺縣人永樂六年舉鄉試入大學八年擢刑科給事中舉劾權貴無所避每奏事大聲如鐘上令餓之數日奏對如故

上曰是天生也每見呼爲大聲秀才嘗言事忤旨命坎瘞奉天門外七日不死赦出還職尋陞吏科都給事中一日率同列論事觸上怒落職罰修象房同事者先治完降官去諤貧不能顧役躬治甚力值駕至觀象上問治屋者爲誰諤前俯伏具道所以

上憐之命復其官搏擊愈甚十一年奉使雲南還

命署通政司事逾年署應天府復署刑部十四年署
鴻臚明年改署工部所至能其官十六年六月擢順
天府尹政尚嚴察頗有張趙風嘗出行誤衝 皇太
子駕 太子訴於 上上曰陳府尹是我父母富竟
不問其優假如此既而執政者忌之出爲湖廣按察
副使三載刑政肅清一道無冤獄亦無冤民奏最改
山西坐事落職洪熙改元遇赦應復 上曰諤小人
也不宜以玷方面貶海鹽知縣 上一日問左右大
聲官人何在宜置轉導使人得聞過乃授荆府長史
多所匡益 上賜以忠良鯁直四字示寵異焉宣德
三年與王不協遷鎮江府同知致仕歸正統九年卒
於家論曰陳公以犯顏敢諫屢瀕於死賴 文皇
仁皇之明躡而復奮然竟齟齬坎壈其身語云直道
三黜豈欺我哉

主官
出爲
郡丞

順天府尹藺君琦墓志銘

李東陽

正德六年辛未六月二十日順天府尹藺君卒於家
藺出晉韓厥支孫以邑爲氏今世頗希見居濟南德
平者爲鉅族累世弗顯君生而穎出志操非凡鬼比
補縣學弟子員成化十年甲午舉山東鄉薦十七年
辛丑登進士第十九年癸卯被選爲兵科給事中累
遷左右都給事中其所論列或獨上累至數十多切
時務嘗勾稽邊儲會簡京營兵馬巡視諸馬房芻牧
充楚府冊封副使皆出特遣承勅捧冊以行隨事舉
職無弗稱者弘治六年癸丑擢順天府丞十四年辛

亥乃進府尹君志本愛民佐事既久熟政體知民瘼
壹意撫字徭賦叢沓極力應辦惟財力弗給是懼民
亦安之無異辭嘗條上十二事多行之者三載考績
賜誥命進階通議大夫累贈厥考拳及祖守成如其
官妣皆淑人十八年乙丑 今天子卽阼乞致仕歸
訓子孫化鄉黨率用禮讓於凡世務悉置弗問蓋年
七十有一而卒訃聞 詔賜祭葬如例君質直無崖
谷敦尚儉素遇事勤慎不爲表暴而身致通顯以壽
考終亦可以無憾已

順天府尹劉公淑相墓志銘

霍 韜

君諱淑相字養忠劉氏湖廣黃州府麻城縣人正德
九年甲戌舉進士十二年丁丑授南京兵部車駕司
主事十五年庚辰 武皇南狩孽帥江彬宦者張銳
憑寵爲虐人憚迎覲養忠詣儀真覲奏對不懼一武
皇顧嘉曰小主事爽辨乃爾遂知名是年陞署員外
郎十六年九月陞南京刑部廣西司署郎中嘉靖二
年九月調兵部車駕司署郎中三月調職方司署郎
中四月實授是月陞山東左政司左叅議六年十一
月陞山東按察司副使八年六月改密雲兵備九年

十月陞四川按察使十一年五月陞四川右布政使十二年七月陞廣西左布政使十三年八月陞順天府尹先是永樂初徙天下富民填北京供坊廂富戶役遂籍北京爲北京民年需原籍幫銀有司年徵銀解戶部發府給富民曰供坊廂役云十五年福建解銀六千有奇到部部發府曰給富戶府之僚及胥亦曰合給富戶養忠曰富戶何名給若是銀也胥曰例富戶亦告曰例養忠曰何例胥曰年承行矣久卽爲例養忠曰國初土著民寡富戶供坊廂役費需寔繁原籍幫供寔宜今土著日增富戶隸籍順天與土著

民同間役供費與土著民又同凡有役費府下兩縣縣下廂坊詰丁揆畝均出供費何富戶獨得若是幫銀也胥語塞僚曰銀給富戶乃無後虞養忠曰何虞僚不答蓋僚嫻大臣通富戶賂大臣求必給銀大臣市權以迫養忠養忠不懾下兩縣覈年供需費銀著籍覈實費不什一著例曰季覈費季給銀富民無從得給銀矣時有輸粟生周禎實養忠親駿子也富戶夏昇兄夏昇隸東廠主書禍福口出投二百金餌周禎假曰爲囑尹周禎故不識事謂尹可囑入言養忠叱出夏昇告東廠逮周禎備毒刑訊曰必言尹與知

謀乃免死頑曰尹實不知願自死大臣嗾東廠逼攀尹家童與知謀連玷養忠養忠憤曰權奸敢爾遂訴大臣囑託納贓數十事上知養忠言實欲兩全乃詔不問養忠童玷大臣贓跡亦寢獨謂養忠訐大臣罷養忠出詔獄到家踰年卒君子曰養忠奇男子也侃侃剛直子身撻虎豹之吻了無懾色不遇明主身禍未知所底雖未沾恩大昭衷素不可謂不幸也已涓厓生韜於養忠同年養忠訐大臣贓跡大臣抗愬獄由波及韜故志養忠墓著養忠獄由微顯闡幽之旨也

順天府尹查公秉蠡墓志銘

徐階

嘉靖辛酉閏五月十有六日亞中大夫順天府府尹近川查公卒於官其子太學生志文以訃聞賜祭一壇命有司治葬事上方慎重卹典卽於例合猶必問其人何如而公位三品未滿一考獨獲被恩數於是士大夫仰見上之知公又惜公幸旣受知而不及竟其用也公爲人凝重簡遠有黃子之度居常獨見謂長者耳及臨事確有定守不可以毀譽利害擾之使亂迫之使急至於進取之際澹如也當始舉進士時將疏請展墓或謂公宜少遲以需臺諫之選

笑不應及予告還例授黃州推官尤公者雜至終笑不應其在黃州諸所讞鞫不視上官意爲重輕亦不以請託有所縱捨召拜禮科給事中上議舉莊敬冠讀禮當事者惑傍言不敢任而以禮繁難行爲解公抗疏請簡其儀節後踰年卒如公議行之楚世子弑其父有司未能正法公覈其報訃日月之訛而律以春秋不嘗藥之義獄遂定轉戶科右給事中尋轉左會朝覲考察疏陳黜酷吏禁罰贖緩征科等若干條語多犯時忌竟以言謫雲南定遠典史復爲建寧推官遷刑部主事改吏部累遷至文選郎中盡取諸條

例去其舛複裁爲一定吏不得爲奸有干請者溫詞遣之卒無所撓屈間見誚責居之如常或教以迎合謝不能而起遷太常少卿改大理少卿遷太僕卿所至舉其職遂尹順天涖事五日觸暑得疾以卒距生弘治甲子四月十三日年五十八耳公之先出於周以所食邑爲姓唐時胥臣爲司空師詣爲柱國南唐時某爲尚書宋時某爲龍圖待制其後有號仁齋者自休寧徙居海寧之花園七傳至御史中丞約於公爲叔父故公祖益封南京刑部主事又封奉政大夫而公父繪號雪岐生四子公與仲兄南京刑部郎中

秉直相繼以科第起查氏遂益有聞公於爲子爲弟以孝敬稱撫其伯兄之孤志學志譽以慈稱自爲諸生以文稱歷官以廉稱然未嘗自表暴與人處退然若無能者蓋其性然也子男三長卽志文次志宏領戊午順天鄉薦次卽志立舉丙辰進士今爲禮部郎中

順天府丞周璽傳

周璽字天章弘治丙辰舉進士除吏科給事中時

孝皇優容直言璽抗疏有關國體切民隱者多見

采納轉工科尋擢禮科都諫迨武宗初服逆瑾擅

權惡璽直乃陞順天府丞實則抑之也未幾同錦衣

指揮楊玉勘事赤縣楊王者瑾之黨也衆見玉皆低

首璽獨與抗辭色不少假借事竣瑾嗾玉誣璽笈視

近臣遂矯制付詔獄極其拷掠身無完膚弗少屈

曰吾死不足惜使忠義畏悞爲可惜耳瑾聞益憾之

使削籍奪其勅命尋卒於京邸越三年瑾伏誅國是

既明用言官議還其官遣守臣諭祭併復其家世
宗繼統詔錄先朝守正被害之臣當道首以璽言遣
官加恤典有抑鬱未伸遽焉淪沒之句廕叙其嗣

順天府府丞景公溱墓志銘

王崇古

公諱溱字濟之別號蒲津公生於弘治壬子二月卒
於嘉靖癸丑五月壽六十有二公生有異兆性淳氣
清祖翁鍾愛之八歲侍祖寢食孝敬如成人卽學日
記千言祖翁臨終特貽以書舍地洎祖母遺物執其
手曰兒將大我門惜予不及見耳公涕泗奉教隨父
廬祖墓側父遘疾泣請以歸父歿公哀毀幾絕痛母
寡多疾卽祖遺舍力學定省母稍不御藥必號泣跪
進每祈天請身代母賴以康癸酉舉於鄉叔大叅公
致政歸乏嫡嗣懇王孺人求公爲繼公痛違所生泣

謝不忍後叔翁許後以榮兄嫂公勉從母兄命權奉
叔養庚辰登會試辛巳賜二甲進士第考出繼無貶
封父母例作書告叔翁請如約書父母籍誓母忘叔
父母養祀以全家庭孝友詞意誠怛聞者感焉尋授
南京陝西道監察御史便省母叔曲全恩禮日念遠
違母叔常鬱鬱未期忽膺疾告還二年疾愈遇詔促
諸在告者期甚迫人勸公行公曰吾母叔老而依我
甚慶違孝致忠非時也竟不赴叔父母先後卒公侍
疾執喪一如子職督嗣人治塋葬率子孫歲時祭享
期百世無替叔遺豐產尺寸無取尋居母喪慟毀骨

立餒粥期年面深墨遠覓南杉甃壙奉父母合窆既
終制猶縞素逾三歲遇歲時生忌羞祀必躬每至墓
道攀栢悲號終身永慕不衰敬伯兄如父平生無違
言失色終身不異析愛姊篤生養歿葬仍撫庶孤存
其祀育諸姪暨諸從姪如子教養婚嫁慈惠周至對
夫婦如賓盛暑燕居未嘗有佚容劉孺人無出嘗爲
取兄女育逾已出長擇名門厚裝歸焉睦宗族親黨
有禮周給恤患內外賴以立者甚衆始公赴南臺任
甫數月卽糾論武臣干進詞連中貴及郊迎立閣戚
貪功冒封語侵宰執士論稱直畱都倉場中宦久依

爲市公嘗巡視搜詭冒慎出納革樣米禁公私科擾
儲政一清云家食旣久充養日遽蹉臺余公光薦公
才賢奉命復起公北臺公丰采端凝論思忠懇每監
禮隨駕敷奏趨蹌肅有常度 上時注目焉尋按畿
內首罷貴臣赴 陵供需繼疏止薊山開礦餘免刑
興利辨冤救荒疏凡百上咸稱旨官民甚賴之將代
詔築沙河宮城司空奏檄近郊民供役時北虜數
入寇關隘久壞又吏治多汚徵斂日煩公條上四事
曰慎選任以清政本曰溥實惠以厚邦本曰增邊防
以固邦圉曰停修築以寬民力 上皆嘉納城工得

暫停後二十年虜犯近郊卒如公言繼監丁酉畿試
防範有方尋按江右江右俗健訟多貴臣號稱難理
公旣渡江嚴科條數十款洞悉民隱禁教誘抑豪右
吏民懷畏誦之不衰會 章皇后梓宮下九江公迎

護月餘寢食俱廢檄所司肅祀儲備無敢不虔而諸
護使餽遺咸謝罷使者不悅冀有以中之會風便龍
舟一夕渡湖 上聞賜文綺君子謂公忠誠所格云
公兩按南北黜貪墨抑僥倖獎廉拔滯糾名覈實凡
所舉刺賢否心服律已清正御下溫嚴日費不百錢
每行郡必令有司檢封衣笥江右北還衣多敝不充

原筭雖圖書亦不少攜諸司以趙清獻日之所至興
學課士斥浮崇正昌黎表韓公祠豫章建文謝祠修
白鹿書院申明教規英雋多出其門登顯仕者繼典
刷京畿卷主閱中臺章奏咸務尚體要中丞獻替多
公草定以年勞擢順天府丞約已除蠹官府肅清會
司徒議徵畿民牛車空運京粟出關公卽疏陳不便
民狀仍上便宜數事竟從公議無何公疾作累疏請
告清議重惜之公先後家居三十年杜門謝客讀書
賦詩教子耕讀坐臥一小屋闌堵不治囊無餘資澹
然如寒士足跡不入公府人不敢干以私獎勵後進
疊疊不倦每聞軍國重事繫忠魏闕慨然不忘憂盛
司表薦數十竟不起命也公歿之歲元日有龍起公
舍旣病革兒童聞空中鼓吹音忽雷雨大作乃逝嗚
呼異哉

順天府府尹鄭沂傳

雷禮

鄭沂不知何許人國初入仕歷監察御史洪武三年
 沂言京師為天下根本四方之所瞻仰爵位之設當
 使內尊而外卑內重而外輕所以隆國勢而安天下
 也今南京北京知府與在外散知府同甚失內外之
 統宜改應天府知府為南京尹則國體尊而爵位當
 矣人命至重古人所矜各府宜設推官一員專掌刑
 名不預他政庶責有所歸而人無冤抑矣又殿中侍
 御史之設所以備顧問司諫諍其員不可一日缺也
 今又虛其職豈以天下之大人材之眾而無能勝其

始設
雅官

始定
府尹
體

任者哉宜從銓註以肅朝儀又各處雖立遞運而凡轉送官物多僦民船每致擾民今當廣增遞運船數與稅糧內定民貲力之厚者以充之國家征伐必資馬匹宜於兩浙空閑之地設牧馬之官選牝馬養於其中數年之後孳息蕃衍足以備武事 上皆從之四年任六年致仕

應天府尹薛均傳

薛均湖廣黃州府蘄水縣人曾祖天定仕元爲兩淮都招討上護軍祖楚卿襲總管父徵元兩淮水陸都統制從 高皇帝渡江叅知幕府督金華軍事均生時徵夢人投萬鈞懷中遂名萬鈞以 高皇帝命更名均少有奇節好讀書見羣兒逐戲輒唾去不顧里中人奇之已而補博士弟子治五經名籍甚性又峻潔清苦而敦孝誼會郡守李公以懷才舉召赴南畿上十策 高皇帝見而驚咤久之將大用而均陳臣母疾危放歸其明年 上辟天下文武廉能之士郡

人江勝等復以均聞因授辦事州同已而除揚州府
泰州州同授承務郎御史嚴以均固非百里才保署
兩淮都轉運鹽使司知三品事加宣德郎未久除知
合州 文皇帝詔入爲陝西行太僕寺卿以內艱歸
哀慘三年如一日詔取均不出再詔再不出凡三詔
而均出授均應天府尹益尚廉明獨買頓舍餘一片
地種蔬甚具旦莫荷鋤往芸之神王也日飽饘粥菜
茹 文皇帝密使人廉之偵其飯饘粥也笑曰人皆
樂惟孤與均苦耳然庭無廢事應天先是以租不時
收當事者皆以罪去均到官筦事展月輒完報頃

卽乞歸其奏曰均昧死上言臣以一介之夫榮資到
今曾亡豪釐益國事而徵簡 聖心猥越溇泥此臣
罪令擢髮奚數顧臣今年七十老矣亡能筦事惟
陛下財察時 上特進均禮部侍郎固畱均均拂衣
去不顧性不善交多齟齬貴人歸譽人謂均宦深多
金也需其出私發均篋惟冥資一具譽人莫解也詰
之故均曰遺兒孫無它長物令世業此當有以活矣
貴人悵然噤口者久之其清苦如此歸剪茅構廬蕭
然蓬茨足蔽風日諸當事貴人造均均慝不一見也
晚號隱林野老吟咏自喜居恒念母甚構望雲暈爲

詩若干讀之輒泣數行下云

應天府尹張璘傳

實錄

應天府尹張璘字文玉湖廣黃岡人永樂中由進士擢山東布政司右叅政改山西宣德二年調福建考最陞應天府尹璘聰敏廉潔幹濟所至恤民爲京尹不諂事中官雖屢讒璘於上不聽宣德七年九月以病歿

應天府尹彭君信墓碑

王 與

君彭氏諱信字中孚浙江仁和人少以才俊補郡校
生力學工文詞在諸生中已燁然有聲景泰庚午甲
鄉試辛未中進士甲科會憲臣有言宜選進士才茂
者積學中秘如永樂初故事君與選入翰林爲庶吉
士癸未擢山東道御史巡歷紫荊諸關塞修城堡建
斥堠防慮周悉邊庭爲之無警乙亥巡按廣東時嶺
南未靖武將專征頗易君儒生君初不爲較一日將
出師誓衆君伺帥語間爲陳說方略申嚴號令揆度
事機切中要害卒之殄滅夷僚吾兵無挫衄君指縱

之功居多倂奏帥以彼所得賞格讓君君曰吾文士也吾自有階奚以武爲識者偉其功而多其不伐丁丑犇父喪歸杭服除改貴州道監察御史母姚氏爲太孺人已卯冬巡按陝西歲滿且代藩憲交章願留謂關右民勁悍其巽悞者至不能自立君治之彊者鋤弱者植威惠竝行得憲臣體 上從之爲留君再期壬午巡按河南蓋君自陝西還未 而關以東與河南北境風聲所至奸宄屏跡吏無受賂而流移占復當是時君爲御史秩且滿巡歷諸藩無寧歲其勞績茂著 上在東朝雅知之及卽位遂陞君順天

府丞順天畿甸在輦轂下征徭常倍蓰他郡加之達官貴人園田錯午侵牟武斷民用困瘁君贊治之暇周行列邑楊摧折之威施拊循之政方嚴之下惠裕繼之三年奏課賜誥命階中憲大夫加贈父宗善如其官母封太恭人會應天缺尹陞君任焉壬辰四月甫涖任秋八月巳酉感風疾卒先卒一月其兄恭自杭奉太恭人來就養時年七十有九君退自公輒携其子明娛嬉母前明纔十二君撫之告母曰兒幸荷國恩得至此圖所以報不徒欲遂吾一家之歡蓋將推以及民老老幼幼俾無一家之不遂其歡嗚呼君

之志何如也而今已矣此間巷之民所以奔走弔哭
慕之切而哀之深也君爲人性度坦夷人謂其有納
污藏疾之量至於遇事敢爲果斷立發則又謂其不
茹柔吐剛君生永樂辛丑享年五十有二昔同年讀
書秘閣者二十八人而出杭郡者四人相得一時歡
甚厥後二十八人者榮辱升沉之外又重有存歿之
感獨幸君與王學士獻童庶子緣張刑曹瑄四人者
皆無恙而予與太常又獲陪君同仕于南都方竊自
幸而君又去予以歿此予所以慕而哀之抑又有甚
焉者也

應天府尹魯公崇志傳

京學志

公諱崇志字懋功浙江天台人父穆累官都察院右
僉都御史風望重一時公爲兒時聞家學已屹然有
自立之志景泰庚午領鄉薦邑令瞞以白金力辭弗
受甲戌成進士授吏科給事中彈擊不避權要上
嘉獎之賜五倫書一帙天順初奉勅齎銀數萬兩給
賞邊戍防範嚴密下無敢欺戍者皆蒙實惠尋命賞
京士衣絮其立法之嚴施惠之均與前賞同時武臣
曹欽跋扈舉兵犯闕公適待漏闕下駭其事卽馳馬
與曹一偏裨格鬪大軍尋亦合而曹就誅矣癸未陞

南京太僕寺少卿公徧歷州郡釐其宿弊傳以新法
不數年馬遂蕃息而民咸稱便成化癸巳陞應天府
尹先是七邑民阻饑逋賦數萬石公爲勸貸以代之
輸而賑其貧者溧水民孔姓者武斷於鄉人患苦之
有司莫敢撻公擒置之法中人王敬怙勢以鹽二萬
引懇鬻規重利公厲色拒之益公急於爲民雖舉世
所趨不難出身以當其衝慨然有烈丈夫之風焉壬
寅九載秩滿加正二品祿仍掌府事明年癸卯八月
二日終於位壽六十有六計聞遣官營葬仍命藩司
諭祭公爲人愷悌詳雅以公廉自持怨有不讐而德
無不報一介不苟取予尤加意青衿今學櫺星三門
猶公所創建云

應天府尹秦崇傳

實錄

應天府尹秦崇字智崇山東單縣人天順四年進士授兵科給事中 憲宗卽位初與諸科劾權倖舞法者成化元年貴州蠻酋起爲邊患朝廷命將征之崇往監其軍奏凱還加俸二級累遷都給事中七年陞太僕寺少卿十七年陞南京光祿寺卿轉南京太僕寺卿弘治三年遷應天府尹明年八月卒官邸蕭然府丞冀綺合賻贈爲治後事訃聞賜祭葬如例崇性剛勁不屈居官三十餘年皆貨財出納之地而不爲所汙可謂難矣

應天府尹高君敞墓碑

吳寬

弘治戊午十一月八日應天府尹高君以暴疾卒年五十七上聞訃命官諭祭營葬悉如例君諱敞字德廣姓高氏蘇之崑山人累世晦蹟無顯者惟積德久始發于君初其父祖見君資美謂必振其家擇經師遣從之游弱冠學且成充縣學生成化辛卯鄉試中式明年會試復中廷試蒙賜進士出身乙未授禮部主客司主事戊戌陞精膳司署員外郎辛丑陞本司署郎中數月實授丙午擢順天府丞弘治辛亥丁外艱服闋改應天府丞丙辰再擢府尹君在禮部

時數奉使於外當 今上初立爲儲副命頒賞賚南
京承接上下儀度雅飭文武大臣咸器重之再遣遼
府行冊封禮還復齎銀幣賞大同將士之有軍功者
南北跋履未嘗寧居會有府丞之缺吏部以君有年
勞推擢陞任時府事方殷佐治不倦及 今上卽位
耕籍田君執事恭謹禮成賜宴人以爲榮畿內饑具
疏言民流亾狀乞發內帑白金五萬兩賑濟詔如其
請民賴以甦者甚衆鄉試爲提調官已而行考察法
黜陟屬吏惟公及爲府尹政務填委以次裁決畢卽
欲以簡靜治之或勸以都下非外郡比自古尹京者
必嚴厲明察始稱其官君笑曰任吾性而已公退輒
與賓客讌飲如平時久之吏樂其簡民安其易府中
殆無事君美儀觀襟度疎潤不立厓岍與人處盃酒
談笑歡如也篤於孝友母弟爲人贅壻而卒養其孤
寡於家至宗鄰貧乏輒有所濟嘗以強恕自號足以
見所志矣

應天府府尹于冕傳

實錄

于冕字景瞻浙江錢唐縣人少保兵部尚書謙之子
景泰元年以謙功廢授世襲副千戶謙歿冕亦從坐
謫龍門屢上疏白其父冤 憲宗登極謙冤昭雪并
復冕官冕自陳不願武職改兵部員外郎累陞禮部
郎中南京太僕寺少卿應天府府尹致仕弘治十三
年十二月卒於家賜祭葬如例冕雖不由科目然頗
涉書史有幹局歷官能舉其職卒無子謙後遂絕先
嘗請以其遠族人之子允忠爲後今襲爲杭州衛副
千戶

應天府尹吳公雄墓志

公諱雄字文英姓吳氏其先杭州仁和人自其太父始居京師公少能自力於學成化丁酉舉鄉試明年第進士授刑部主事丁父憂服除仍舊官乙巳遷員外郎河南湯陰淇二縣與大名之濬縣比壤民俗雜揉議者欲割濬地隸河南濬人恆營不服至相殺傷朝命公往視之爲正其分界仍罪其徼黠者數人事遂定尋晉郎中長淮衛指揮彭璿貪縱豪奪其下訟之且誣其家塚域盜穴穿皇陵山脉以驚動聽者公按之止得其貪暴諸不法事父子皆決配數千里外

以爲平弘治辛亥陞河南南副使會使久缺多留獄公至攝司事盡取而決之獄爲之空丙辰轉湖廣按察使時歲旱城中有火災公禱而雨火滅旣而連三歲旱禱輒雨楚人歌之郴州蠻侵掠居人有司蒐捕之窮詰其黨欲盡致之歿公言於巡撫者以爲此孱弱小醜無能爲必喜事者爲是張皇耳第取其首惡誅之餘無所問有衛卒以私憾殺其宗人而棄其尸僧寺之井中其妻子踪跡得之訴于官卒夜令人啟寺中棺出其尸易置之明日視之則非其所殺者衆莫能辨公他日避雨寺中見一棺血痕淋漓疑之乃召

其妻子往驗遂得其情已未拜應天府尹初視事日集僚佐堂上令吏人執簿出公帑所積貯一一點視之曰政貴謹始也果亡去銀若干鋌公密察之卽得盜者一府以爲神先是給路引於府者例入錢以供堂餐尹多自取之公獨籍之官或以爲矯明年兵部下令收諸路引錢歸之京師以備邊用衆益服公之廉明南京有長橋橫江口歲久圯壞有司重於改作公召諸富人語之曰爾曹皆大家也與其施財供佛爲無益之費豈若移之治橋之爲大利益邪衆皆忻然應令壬戌南畿旱應天爲甚總漕者亟征兌運米

公曰民病已甚不可重擾輒奏止之又請兩淮所貯
綱米三十餘萬石以賑饑者全活甚衆甲子秋監鄉
試以積勞成疾會當入覲兼程行比至潞河疾增劇
召其子大經等謂曰吾官至此分願已足顧有老母
在不能終養以爲憾耳汝曹可馳往應天迎歸謹事
之遂卒蓋其年十月二十九日也得年五十有六訃
聞命禮部諭祭于其家工部營葬域公爲人簡直居
官廉謹奉法棘棘不阿臨事能斷摧奸擊惡推見至
隱而心一主於惠愛嘗讀趙廣漢傳嘆曰搆會吏民
以賊無辜是豈爲民父母之道宜其見刑也至龔黃
傳則曰爲吏者當如是矣公志嚮遠大常以功名自
許所至皆有聲及尹京府才望益著乃不究其用而
止君子惜之大父諱清父諱春皆以公貴贈通議大
夫應天府尹

應天府府尹冀綺傳

應天府府尹冀綺字汝華揚州寶應縣人成化己丑
進士授戶部主事歷員外郎郎中以歲饑賑濟河間
諸府稱旨往偏頭關督餉有功加俸一級累遷應天
府府丞南京太僕寺卿應天府府尹嘗陳邊務及捕
盜輯民二十餘事頗見採納已而坐言官論劾自陳
致仕正德五年八月卒

應天府尹孫公春傳

祥符文獻志

公諱春字一元爲開封之尉氏人遷汴大父貞兩淮
運判父瑛以公貴封戶部主事贈署郎中事員外郎
公生有異質爲諸生開封郡庠性剛直寡合獨嗜學
不倦成化乙酉領鄉薦戊戌舉進士授戶部主事歷
署郎中事員外郎丁外艱服闋實授郎中尋陞知鞏
昌府鞏昌地鄰番族號難治公職無不舉副使王雲
鳳御史王凱奏公仁愛如廉范勸課如龔遂撫字如
陽城清直如包拯巡撫都御史周公季麟督餉都御
史李公鏊奏公政績偉異給白金綵幣以旌之任將

滿陞貴州左叅政奉勅提督糧儲三載陞廣西右布政使尋轉左御史陶煦言公事體練達才識老成將三載陞應天府尹歲餘言官誤劾公嘗市柵木媚大臣焦公芳公具疏白事始末遂懇乞致仕時年已六十九矣公請老還汴治城南草堂集鄉里諸耆艾爲會日巾車往來觴詠談笑其精明剛大之氣老而不減云平生不蓄姬妾任宜人卒鰥居十餘年以終壽七十有四

應天府府尹王宸傳

應天府府尹王宸字具瞻其先河南邠縣人因從戎籍于真定弘治庚戌進士授吏科給事中遼東守臣妄殺夷人冒功次命宸往案之尋遷刑科左給事中禮科都給事中 上新立番僧那卜堅叅道士陳應循以左道出入禁掖宸請明正其罪戊辰遷吏科都給事中己巳遷光祿寺少卿庚午遷南京太常寺少卿壬申遷南京光祿寺卿乙亥擢應天府府尹明年乞歸又四年卒時正德十五年十月賜祭葬宸始終清慎爲士論所與

應天府府尹陳公錫傳

黃佐

陳錫字祐卿南海人宋朝散大夫康延之後祖觀字思賢布衣博學敦行從孔伯平遊不求聞達工於詩學士黃諫擬諸姚鵠岑參有滄江集行於世父珙字伯玉以戴記授徒貢爲上猶訓導以身率諸生時張弼知南安府甚加敬禮嘗夢崔清獻教之曰子知學乎毋不敬內敬恒存思無邪外邪難入寤而索諸言行錄果協於是終身誦之世傳細素至錫尤力學弘治乙丑進士授戶部主事嘗司廐逆瑾方用事羣璫列中外雖束芻出納亦混主討錫以法繩之衆不敢

肆司漕通州革弊政六條人以爲便轉員外郎調吏部稽勲自尋陞郎中一時名流咸所咨決屬舍人朱麒求襲封保國公錫駁之曰洪武之約非有重大軍功不得封爵襲蔭今朱麒襲公非約也宜從始封伯爵尚書楊一清從其議因著爲令正德丁丑遷福建參政歷左布政綏定叛軍鈞稽乾沒樹立風紀綽有令聞擢應天府府尹去之日閩人爲立遺愛亭居應天未及三載廷議欲晉孤卿錫竟請致仕凡三疏得允優游田園以翰墨自娛凡十餘年始卒年八十有一賜祭葬郡人祀之鄉賢祠

京兆尹王公震傳

歸有光

京兆尹王公震字威遠曾祖景賢初自燕南徙任縣遂占籍于邢今爲邢臺人祖壘宣德間以鄉進士爲平度州同知抗中使謫戍灤川數歲病思歸子整上疏代父整戍又二十八年始赦還整妻亦歿於戍後妻生公體貌豐偉善騎射博涉經史弘治癸丑進士觀政大理授戶部主事奉使部送犒軍銀于西夏至紅城堡後又使雲中至陽和堡猝爲虜圍公皆率衆守禦虜以解去正德初權九江稅劉瑾愛幸蒼頭奴唐英王俊至多所誅求公絕不爲禮時瑾怙權流毒

天下士大夫二人還欲訴于瑾皆病歿於道人以爲
公幸遷員外郎尚書韓文爲瑾陷下獄罰贖二千石
公率其僚捐三年俸贖韓尚書得出庚午川湖盜劉
烈起猖獗甚上命兵部尚書洪鍾討之洪尚書奏
公知兵請以爲鄖陽守迄平寇甚得鄖陽之力歷陞
河南右參政潁川盜小張虎嘯聚公往捕之不四月
小張虎就擒戮小張虎餘黨全活甚衆川人感其德
立祠祀之嘉靖初陞河南左布政是年冬陞應天府
尹奏罷上元江寧花園夫千餘人省諸官寺獄具銀
千餘兩覈江灘蘆葦千餘頃以佐赤縣里甲費尋上

書乞骸骨歸初公舉進士二親皆在堂未幾相繼卒
所至扁其居爲永感長沙李文正公率館閣諸公爲
賦詩趙郡石文隱公爲之序自是每陞一官必悲思
其親自在部已獲推贈及爲京兆得贈三世皆如其
官公天性純孝有厚德嘗在京師鄖人張得才爲部
從事病死妻子貧不能歸公聞之愴然捐金助其喪
還後其子寅中鄉舉來謝言其父喪前至金陵欲寄
其鄉人舟鄉人負約遂寄他舟經小孤山鄉人之舟
覆過吉水欲寓山寺寺僧固拒不納經夕而寺焚以
公之施惠孤喪與神明符也公旣歸所蓄書數千卷

悉輦送郡學以資學者講習家居杜門足跡不至公
府今邢州士大夫雖隆貴門第不改布素至以造官
府爲耻子弟斂戢市無綺紈之遊繇公之化也嘉靖
辛丑年八十二卒計聞 賜葬祭
贊曰予至邢訪其先賢士大夫近代皆稱王京兆京
兆所居官其條教方略無文字可考僅僅得其家狀
履歷然今邢中風俗之厚本于京兆予數過學宮取
其遺書讀之爲之歎息其高風可仰矣予以是論次
之

應天府府尹柴公奇行狀

陸深

公諱奇字德美號黼菴姓柴氏崑山人也其先出嘉
定有諱廷富者元萬戶公之始祖也公生而穎敏初
同故禮部主事盛公鍾濟陽令杭公東往謁太常卿
夏公仲昭公未出私約分識其壁間文字凡若干篇
及歸書之不遺一字與故太保顧文康公同爲邑庠
生時令崑山者慈谿楊公子器有鑒賞才尤慎許可
一見公所業文卽曰此奇士也因屬以遊浙中用博
聞見弘治壬子遭通議府君之喪家適中落公畢力
營喪葬如禮辛酉中應天府鄉試名在第六主司刻

其文以程多士正德辛未與弟太同登楊慎榜進士
觀政吏部時少師楊公遠菴爲冢宰上書言東南水
利事深爲楊公所器復極陳白茅塘鴉浦之利害請
以逆瑾沒入貲給濟工費楊公上其議於朝特命工
部尚書李公充嗣往司其事績用告成實公策也是
歲八月吏部考選科道以諫諍論試諸進士公居第
一銓授吏科給事中時劇賊劉六等弄兵山東朝廷
討之命將出師以公與御史吳堂爲監軍旣班師有
白金文綺之賜權貴囑託一切絕不行所核功罪皆
當壬申二月賊陷曲阜城禍及闕里禮籍樂器皆焚

蕩公奏移曲阜城以就孔廟永爲保障九月凱旋獻
俘賜金織鷲袍與宴兵部加俸二級癸酉六月丁計
淑人憂弟太任刑部主事適卒乃扶攜二柩歸葬如
禮乙亥九月服闋丙子四月還朝復除吏科給事中
丁丑六月滿一考授勅階徵仕郎八月遷戶科右給
事中戊寅夏再遷左於吏科當事多所建白疏上卽
焚草間有傳誦者若 武宗南巡之疏錢寧持寵之
劾與邊儲屯政事關大體蓋有人所不能言者巳卯
八月陞南京光祿寺少卿時 武宗駐蹕南京凡諸
供應皆先事而備若寺之圯廢次第興復查革更正

多所修舉辛巳夏今上登極詔考察京官適寺長
關公奉行惟謹黜屬吏不職者五人查復厨役占於
他所者凡百有二十餘人謗言叢集一莫之顧然竟
無他壬午改元公力辭加俸上以公山東河南剿
賊之功不允八月進階奉政大夫癸未三月滿一考
丙戌十月六載考績加授修正庶尹己丑三月進賀
冊立中宮箋至京陞應天府府丞值尹闕攝篆者五
月巡撫都御史陳公祥特疏之辛卯三月以郊祀
恩進階中憲大夫八月鄉試充提調官庀事惟謹壬
辰九月陞應天府府尹秋八月頒詔例授誥命封贈

及二代仍廢一子入監甲午春清查官占埋沒地還
之民間以絕權勢起佃之謀復積科試羨餘開拓貢
院矩範儀觀爲之一新是秋鄉試再爲提調官會南
京太廟災引咎自陳致仕得請卽日東歸家居幾十
年足跡不入公府口不談貴顯時事惟以詩文自娛
樂而已周貧贍族則奮袂爲之不愛也公性孝友歲
時祀先必流涕每謂其子曰祖宗功德不可忘吾平
生無夢夢必有兆皆祖宗之報嘗憶山東時夜過呂
孟社身在賊中暫止郵舍就草榻傍垣遂夢而祖呼
我曰速起速起寤驚而頗疑爲賊乘之方啟戶出探

有逸馬觸垣悉壓覆榻上旁近無完物矣此祖宗之
佑也爾子孫謹識之公以成化庚寅十月十有九日
生以嘉靖壬寅六月七日考終于正寢年七十有三
所著有石池稿嘉樹軒紀聞并黼菴集藏於家

應天府尹贈都察院右副都御史孫公懋墓志

銘

袁 煒

公諱懋字德夫少穎異沉潛篤學弘治壬子中鄉試
辛未第進士知蒲城縣籍有惠政考姝等三年召爲
南京吏科給事中陞廣東布政司右參議按察司副
使兵備清遠以詰中校恣橫被矯誣械至詔獄貶滕
縣典史改貴溪復以安福令陞光州守山東按察副
使廣西江西參政廣西按察使右布政使至今職升
沉黻歷苦節自茹者三十年時論歸重亟欲致公當
道以挽世俗然推公者數四不果用而公年已七十

例當自陳或勸公少待弗可疏上奉旨致仕去之日
行李蕭然南都父老與一時卿大夫咸惜公且服其
去之決也公爲給事中嬖幸用事乘輿數巡幸中外
洵洵言者輒杖死公曰吾言官也可畏死乎言之至
數十上都督朱彬尤佞幸導上縱所之遠去公劾之
其略曰歷觀自古國家信用奸邪未有不爲所禍蓋
其始也媚君以邀寵其終遂挾君以自恣必至於危
宗社乃已臣按朱彬以梟雄之資懷儉邪之志自緣
進用專事從諛游衍馳騁凡可蠱 聖心無所不至
乃於去年導幸南海子幸功德寺又幸昌平地漸遠

日漸久遊樂無節輕褻至尊流聞四方驚駭人聽自
知罪盈惡積公議難容乃挾 陛下自庇故又導駕
遠出居庸無大臣一人保護 陛下孑然獨處苦寒
沙漠之地殆將半載臣觀彬武夫前代漢高白登事
或有未知至如 英廟土木之變則固聞之矣乃導
駕臨宣府又過大同致惹虜賊深入應州與之交戰
六日夜使當時各鎮兵未集幾何不蹈往轍也 聖
駕在外萬幾叢委 兩宮違養郊廟不親四方災異
迭見盜賊蜂起彬在一日爲宗社一日之憂乞將彬
拿送法司按罪重處以雪神人之憤 陛下端居九

重親理萬幾宗社天下幸甚及宸濠倡亂 駕幸南
京公與參贊喬公僇力同心隨機防護濠檻泊龍江
逆黨錯繫諸司而彬等益導 上夜遊伺便竊發公
憂之乃伏闕屢請迴鑾辭甚激切其一曰人君所敬
惟天南郊大祀之典何可以不早行所養惟親 皇
太后千秋之節何可以不及時稱慶所任者庶官也
考察之政雖委吏部而黜陟幽明尚煩宸斷所重者
賢才會試雖屬春官而大廷賜對必俟臨軒凡此
五者皆國家大典禮大政事舉廢遲速之間實安危
治忽攸繫我 皇上以保有大業爲心固宵旰所宜

孜孜者也臣近又聞之遼左諸鎮虜衆連營霸州等
處強賊嘯聚豈不以 駕方遠出京城空虛將以掩
吾不備南自淮陽北抵順天隨路夫役祇候日久饑
餓無聊或至相食况又農務之方殷邪詩曰不留不
處三事就緒又曰徐方不回王曰還歸然則古昔明
王自將未嘗不以農事爲重班師爲急也旬月以來
暴雷震驚風霾大作災變之至厥亦有因尤不可以
不畏也其二曰宸濠大逆不道罪在亟誅今寢食自
如覲生變釁非所以豫亂防也忠臣義士戮力成功
大賞之典久格未行非所以勵人心也天地者人君

之父母人子不可一日不見父母人君不可一歲不祭天地南郊大祀可復遲乎賢才國家器用齊民不能一日不資器用國家不能一時不須賢才臨軒策士可復緩乎然則今日鑿輿旋軫郊祀宗廟太皇太后祔主此固事之至重至大者也若軍馬數萬住劄日久應給芻豆在在告乏旦夕將有不繼之憂秋高馬肥虜易爲逞天威旣遠戎心益生西北難免侵陵之擾北來章疏奏進雖降有明旨前後之間壅滯尚多百司何所奉行南都市廛率多_不單住歇工商廢業生理蕭條小民何以堪命况夫元兇寄泊于江滸逆黨雜繫於狴犴防衛旣久人情懈怠倉卒生變何以禦之臣聞應天府獄南門街往往夜驚羣喊此固人心不安憂疑之所致實乃天心仁愛譴告之有在也仰惟 皇上睿炳幾先明見萬里意外之患所宜預防臣待罪言官不知隱諱伏惟採納以承天意以安人心實宗廟社稷莫大之幸時值彬生日衆期往賀公曰懋抗疏欲置之歿今復賀其生非情也彬雖深憾之然實因公不敢輕動 皇上嗣位以端本正始聖德聖學聖政三事首陳嗣聞雷擊奉天門獸吻及日精門災又陳修八事以答天眷七事至進用老

成篤揚忠義殛誅奸佞翊 聖上中興之治可謂不負所學矣公在廣東時龍眼洞作耗當事者僉議勦之公以該道兵備乃命衆先營堡曰海村良村蘇渡口井濠坪分兵屯守然後進征功成當事欲爲奏報公曰妄殺微功非吾素志殲厥渠魁散其醜類足矣功不滿百何以報爲乃寢其後龍眼洞復叛攻掠州縣惟舊有營堡者不敢犯公舉動不徼小利不急近功槩如此其他隨在布惠無不遺思公每自引晦故多弗傳若河南均 應天損舖戶供應迄今民頌其便至其立身廉介 公事周詳存心平易不爲勢糾不

以物遷善不求知於人言不求文其行則公之天性然也歸之日出俸餘建祠宇置祀田葺先墓周賙親友囊無長物蕭然環堵讀書其中融然不知老之將至時與比隣諸老散步往來笑談終日人望之爲神僊而公自不知其異於人也以嘉靖辛亥六月九日卒於正寢明年仲子黃州推官炤來京師以例乞恩於朝 上若曰嗟夫斯古之遺直也勅禮工諭祭營葬加贈顯秩今 上祇慎名器卿寺以下非功勛異等不獲贈公遭異數一時公卿相與慰籍不已以爲公未究之報云

應天府府尹唐公寬墓志銘

寇陽

公諱寬字栗夫姓唐氏別號蒙山世爲平定州人公
生而穎異自童時卽有大人矩度治尚書不屑屑於
記誦惟以解悟爲文奇氣過人意表伯祖盛能鑑人
目之曰此子必高吾門年十五補郡庠生嘉靖乙酉
領鄉薦明年春下第篤志問學不休壬辰登進士筮
仕永平府節推卽明慎用刑凡所推鞠無不得情者
太守王公褒獎有職任不修乎邊幅清操無愧於神
明之語治三載考績陞刑部福建司主事戊戌陞員
外郎未幾轉郎中奉勅恤刑陝西平反甚衆壬寅陞

懷慶府知府會民疲甚公薄稅省刑鋤強扶弱時鄭
府官校倚勢凌虐平民公每執而杖之又有鄉官掘
城土造屋罪其家人褫其車牛百姓稱快因被毀於
憲司稔知公之廉節竟莫之信也且以毀公之人語
公後公與毀之者遇諸席公絕口不言禮貌如初毀
公之人深自慚愧爲政三年百姓富庶教化大行士
民欲立生祠公聞之力止乃寢其事丁未陞肅州兵
備副使肅近玉關番漢相雜素稱難治公爲政不剛
不柔撫綏有方夷人畏服不敢爲暴有獻遠物者公
性不好珍奇卽卻絕之由是遠人益畏邊圉寧謐時

有無碍紙價千金常例官取入橐公毫髮不取有勸
之者公艷然曰若教我爲不義耶遂作支用戊申陞
陝西行太僕寺卿肅衆感公德政臨行遮道垂泣留
靴爲別云巳酉丁繼母憂還服闋補甘肅行太僕寺
卿癸丑入賀 聖節歸未抵任丁父憂服闋補陝西
苑馬寺卿戊午陞四川右參政尋陞四川按察使公
發奸摘伏剖決如流吏畏民懷咸稱神明庚申陞山
東右布政明年轉左先任者率任庫吏刁索納戶公
知其弊親爲閱視納戶大省浪費時撫院嚴治窩盜
者逮及士夫一方騷動公每爲勸解中外多之壬戌

入覲陸太僕寺卿未幾忽起尊鱸之興語人曰吾精力漸衰虛糜廩祿恐負朝廷盍退處山林以終餘年乎遂上疏乞歸上不允辭陸應天府府尹公不欲往因憶幼年曾夢至南京乃強爲一行至見南京景物宛如夢中嘆曰吾夢旣應終於此矣遂於是年歸越二年卒

應天府丞楊公瓌墓志銘

呂 柟

公諱瓌字仲玉姓楊氏松江華亭人仕爲應天府丞以災異懇乞休致歸歸未幾卒於家寔嘉靖八年八月十七日也其子吏科都給事中秉義以狀問銘初公嘗兩爲南京吏部考功郎中遷尚寶少卿去朝命以柟補公缺方是時予未習考功也至則凡課官察吏一遵公舊或有疑事難政必稽質公所定籍行二年得少免於愆若公之當考察也悉心延訪務得其情雖冢宰中丞咸駭稱神有二三被黜者倡言面證公指實以答罔不慚服予若值茲退步三舍矣當是

時已自考功改武選廖冢宰紀遷北以公剛正篤實
徇公任怨也乃又自武選改考功云於是李司寇承
勛張中丞琮及朱冢宰希周曰楊考功正直不負廖
舉胡少宰世寧有位愧楊前之嘆皆予耳所聞也公
陞尚寶以不便水土辭辭未赴乃戊子陞應天府丞
時陳京兆錫屢疾在告公數署篆節財均賦平物砥
價都人士稱便焉故事讐冢多假手獄卒甘心繫囚
公時巡獄中飭囚病非累藥不效勿狀全活甚衆江
寧丞王震貪酷事覺震已陞他縣囑者芴午公曰彼
邑之民奚罪焉竟坐於法彭鶴齡者溧陽民也嘗忤
母舅舅誣爲盜詞服賊少公曰鶴齡貌非甚貧何利
於此卒得其誣其懲奸釋寃類如此則予目所見也
公舉辛未進士筮仕桐鄉桐鄉當八省之衝民罷於
逆送乃與查覈節制著爲定籍狡獪折夫之徒盡繩
以法然不能當巡按意也乃以賢能薦調開化實薄
之也去桐之日民輟耕罷市攀轅載路以送開化人
好訟聞重利輕生甚至飲藥斷腸取快小忿生女不
舉以嗇嫁貲公痛與懲創頑愚多賴以生其收馬金
鎮之豪沮饒信姚源之盜寬殘破之賦尤爲人所懷
服爭立生祠稱曰鐵知縣云御史王君堯封至考以

誠心愛民語蓋公有是進陞刑部主事矣在正德乙亥年也明年乞便養母改南京驗封主事厥後考功京兆之政皆自桐鄉開化也初公幼有異質端凝簡重父母殊愛之及就外傳穎慧絕人年十二舊溪周寧素爲女相攸見公喜歸索飲至醉弱冠有先正曹憲副時中者許其英敏可希古聖賢公時讀書龍門僧舍外家每饋時羞則曰燦獨不能斷齋畫粥耶棄之以飼鼠又嘗讀書城南鄰女欲假汲以挑公公曰吾可讓魯國一男子乎斥之每試督學皆列高等與兄憲副公瑋齊名時稱松江兩揚王督學鑑之至分廩以贍嘗師莆田方先生岳於秦州所交皆知名士既中弘治乙卯鄉舉遭父贈君營繕公喪時兄憲副方第進士觀政也公哭踊委頓與叔弟琦季弟貢十璉殯殮如禮他日太安人檢篋得封君爲諸子析產狀示焉公哭不忍祝曰吾父爲此將慮吾兄弟啟爭端耶吾兄弟不體是心而或後言者非子也焚之友愛二弟益篤於是公之文行大著而鄉士子從遊者門無停履多科第云嗟呼公孝友積於家庭端諒重於鄉閭如此宜乎莅官行政超邁尋常也公先世上海人遠祖爲府別駕其後有博學者稱兩脚書厨自

是皆以儒鳴沙岡間高祖壽梅公諱德時曾祖樂耕公諱景臯贅於翁氏始家華亭祖月溪公諱文信授散官考南隱公諱雲字民望以長子憲副公貴贈工部營繕司主事妣宋氏封太安人自南隱公以上皆蓄而未發乃至公始大顯又以及其子給事中則公之懿行善政豈偶然哉公生天順甲申十二月二十八日得壽六十有六

應天府治中龐公嵩傳

京學志

公名嵩字振卿居南海弼唐鄉學者稱爲弼唐先生嘉靖甲辰由鄉舉授應天府通判晉治中先後凡八年大京兆缺屢攝府事初至旱魃爲災公督賑委悉霑洽公粟旣竭貸之鄉先生富民誠意懇惻人多應者所全活六萬七千有奇已而蠲其積逋於以勞來拊循之所繇以復業者十萬六千有奇所部民苦役重公取公費議寬之令甲首輸錘免其置辦付之印簿以防侵漁清寄居客戶以助夫役移僻驛馬足以甦衝塗覈冒濫優免及詭稱官戶寄庄戶女戶神帛

堂匠戶以實丁口八邑皆蒙惠焉時江寧葛僊永豐
二鄉數有水患居民餘七戶而已歲課不能辦公爲
築堤闢萊得田三千六百畝立惠民庄四召貧民佃
之流移盡還而全邑訖無代輸之苦百姓至今賴之
折獄無細大必得其情有張元二者以追逃婦不反
公躬至婦所見室畔縣崖矗立林木颯然心動行數
十武而前佯執村老訶問之對曰我但見屍遂得元
二殺人狀又高淳傭人亡其妻妻家以爲死執之公
偵知鄰有畫工以其妻歸日遯也計致畫工奪還之
聞者以爲神戚畹王湧舉人趙君寵占良人妻殺其
夫公并論死居間者萬方拒不聽公饒吏幹在事持
据百廢具舉尤加意造士暇則進諸生課之自損俸
以資賞給歷寒暑無倦淹通五經爲諸生發疑抉異
無不虛往實歸者早遊王陽明湛甘泉兩先生之門
至是奉其緒論爲諸生規建會於新泉書院日與講
習以故一時文行之士成就興起者爲多性嚴明蘄
蘄不可犯而又與有聞於名儒巨公以是施之政亦
以是持其身見義勇爲獨信一力雖賁育不能奪也
單騎行縣所至肅然一蔬片楮不以煩民人目爲龐
青天云府在六年京察例而復與觀察公謂非理上

疏請止之至今著爲挈令晉南刑部郎中曲靖軍民
府知府在所士民銜德旣去而追思之葛儂鄉有特
祠至今俎豆不絕云

應天府通判林公春墓志銘

倪謙

公諱春字孟陽姓林氏其先台之寧海人曾祖某洪
武初以戎事遷居金陵祖某又遷山西太原府右護
衛父本榮又遷代州至公又遷萬全都司龍門守禦
千戶所至宣府乃定居焉公生於太原性資穎異有
志於學比來宣府時縉紳儒碩謫居於是者衆公往
從之資其講益入萬全都司爲弟子員習尚書博覽
羣籍學日宏肆爲程試之文深有理致尤工古文辭
鄉人多持卷軸求之家有其作精於書翰景泰庚午
應順天府鄉試中式會試中副榜當得校官不就入

太學放依親歸參政葉公盛舉同纂修都司地誌搜
考訂定善於序述持身端慎遨遊公卿間惟以禮接
一言不及外事有事逮繫者多齎重賄要其解釋力
謝絕之雖以禮遺以金帛者亦却不受人皆曰士居
貧而能有守若此真難得矣復入太學從翰林學士
呂文懿公卒業志期必舉進士文懿嘗嚮予道公之
學之才之美予已知其人而未識也天順中予爲權
臣所陷謫宣府嘗至學宮見少師楊文貞公扈從北
征詩刻石堂上碑陰刻吏部尚書王文安公記公所
書也予初以爲養正書問之乃云公書又於他處見

其所書已作甚多歎曰名下無虛士信哉未幾公乞
假歸始獲面晤言溫氣和薰然君子也鄉人素愛之
延請者無虛日多速予以陪公能飲至數斗不亂酒
半必握拳商射呼笑爲懽意度灑如也後別去意其
必舉進士竟不成待次吏部僅授應天府通判專理
馬政人咸爲之惜公曰始仕得六品京官於吾足矣
所患職弗能稱耳及至官以清節自厲攻駒考牧恪
盡乃心公平不苛民受其惠無敢干以私者每行縣
較閱止食公廩一毫不取於民蒔蔬公廨隙地至則
摘以自給其廉如此或有笑其迂者公曰我儒者誠

迂若楊伯起則古之迂者也我願學焉初考獻績於
朝吏部以最聞詔嘉之錫以勅命進階承德郎贈其
父如公官贈封母妻皆安人再考復以最書政聲日
起性酷好書每暇輒磨墨伸紙揮汗呵凍寒暑不廢
字體清勁道麗得之者皆珍襲之予幸被宥還復得
與公胥晤南京相處者六載每造公必留飲至醉呼
笑之樂不減疇昔今年暑氣最熾公中暑毒適當開
科屬理場屋事勞遂成痢疾不能食予往視之言論
尚如平時不數日竟卒嗚呼孰意其遽止於斯哉公
爲人外雖和易而內實剛毅處兄弟友愛交朋友誠
信接寮宋敦睦居官孳孳愛民廉介之操乃其素志
不以始終有變故其卒也貧無以爲殮哀積衆賻僅
能舉其喪歸其制行可見矣公生於永樂辛卯七月
九日卒於成化辛卯九月五日享年六十有一

京兆呂君言傳

屠應垓

英皇帝以後嘉興有大臣者三人矣大學士文懿公
原大司馬襄毅公忠迨吾先公康僖皆有功德於時
崇爵顯諡錫之天府以施于後世其子孫亦多修其
先人之業故郡稱世家者必曰三氏云京兆君姓呂
氏名言字伯時文懿公孫也文懿公當英皇帝時
簡入內閣佐上理庶政無弗當上意者而職又
教導太子又懿公卒太子泣謂上曰呂先生死
矣呂先生兒在於是上亟問所謂呂先生兒者而
公長子憲入奏計乃詔以憲爲國子生尋授中書舍

人仕至太常卿太常卿娶沈淑人生京兆君性簡朴
異羣兒而又故呂氏也羣兒皆畏事焉七八歲時同
羣兒出野野有鶩兒或竊鶩歸君怒曰若弗學他卽
學盜吾不願見盜吾終身不願食鶩矣於是羣兒匿
弗敢見也當是時君業時文矣比又從太常公業詩
十五六時諸老生以爲弗若也志氣銳甚謂可立致
上第顧數試數不第乃以蔭補太學生又數試太學
數不第其以爲弗若者皆數第也君乃自諉曰吾先
聞人之裔也吾祖邁德紆謀其后太常公實直亮采
無替顯休夫人所自致者奚一第已也雖一命足以

見志矣遂棄不就試歸歸十餘年而當正德甲戌

入選試吏部授太平府通判太平近江商賈往來郡
故咸有稅通判至則令曰夫商賈國有恒稅郡今又
稅是重以困也其弗稅商賈益纒纒來集矣初 高
帝起兵鳳陽與太平諸郡接壤詔戒諸郡田租然令
戶飼馬官就闕其駒歲歲上之民無所苦其后政敝
諸郡民日貧飼馬馬多死率購他郡駒閱之官官索
賂弗得則曰非良駒也斥弗遣必賂乃可而京師遠
數千里復以其駒馳數千里比至則困敗不任用迺
計其費大率三致一耳以故太平民竄匿不願飼馬

通判職專馬乃宵旦經畫行邑勸勞如故事每一令出民必曰新判令也便于是竄匿者稍稍歸君又嘗有馬政疏矣其略曰制不可更法不可泥今江南駒少北地多且良請令民歲輸銀上之太僕太僕就京師購良馬不困敗而費省十九官民兩利會君以繼母喪歸不果上居繼母喪三年而改應天府通判以故人稱京兆君京兆君至則江南大饑人相食流民就食應天者數十百萬而又疫甚死者遍野君受節賑濟親給食飲不少避流民存活十三然自是君病矣遂懇乞致仕加左府經歷致仕致仕者又一年而

卒春秋蓋五十八云夫京兆君歷二仕幾八年矣其子弗以隨惟一童子年十餘耳平居治政常日晏不知食卽食無重味數日才一舉肉弗飽也中丞吳公時巡撫江南阿叱羣吏無敢近每見君入必肅然起曰廉判來廉判來以故僚佐多忌之而又好議天下事若濶遠無近功然卒有大致乃人曰京兆君迂君亦曰吾迂吾迂弗較也性篤孝少喪母晝夜泣不絕時太母徐孺人在也比太常公娶陸淑人陸淑人善嚴于是托公于母家朝夕惟徐孺人之慕時時號曰豈有人子而弗善事母者哉夫子故有罪也于是遁

回徐孺人始大喜太常公喪公大慟幾絕凡三年而後復故太常公卒時君一無所取惟陸淑人所欲與弗私也是其人豈內外異致者哉予觀世之人有一能者率皦皦務眩外惟恐人弗知密構顯頌馳逐公卿間以故並躋寵榮京兆君懷異才善自守論議勿下人遂負氣阨塞抑鬱抱病死嗚呼傷乎往予遊南都時與君同舟也前有欹橋君遠起曰夫舟行值橋墮柰之何泝橋危途行安乃遂途行此其心豈行險弗知命者其顧肯皦皦營利若今之人哉諺云弗視其明視其冥冥是非其冥冥者耶京兆君娶項氏襄毅女孫與予婦兄弟也生子科恂

祝京兆允明墓志銘

陸 攀

先生諱允明字希哲蘇之長洲人也其先出古太祝以官氏或曰黃帝之後封於祝以國氏云七世祖碧山勝國時由松江來守郡後卒官一子齶於蘇遂為蘇人祖顛正統己未進士終山西布政司右參政父璫母徐氏大學士武功公女先生少穎敏五歲作徑尺字讀書一日數行下九歲能詩有奇語既天賦殊特加內外二祖咸當代魁儒日濡耳染不離典訓稍長遂貫綜羣籍稗官禱家幽遐鬼瑣之言皆入記覽發為文章崇深鉅麗橫從開闔茹涵古今無所不有

或當廣坐詼笑雜選援毫疾書思若泉湧一時名聲
大譟歲壬子舉於鄉故相王文恪公主試事手其卷
不置曰必祝某也旣而果得先生文恪益自喜曰吾
不謬知人自是連試禮部不第當道奇其才會修史
將名薦之弗果初仕興寧令地介嶺海民尚譁訐惑
於譏祥先生示之禮簡進秀異授以經學親爲講解
遂一變其俗羣盜竄處山谷時出焚斂爲設方畧一
旦捕得三十餘輩邑以無警稍遷通判應天府亡何
乞歸又五年卒春秋六十有七夫人李氏鄉先生太
僕少卿應禎之女子男二長續進士入翰林累遷陝

西按察副使先生簡易高曠不樂拘檢在衆若無能
者然默而好深湛之思時獨居著書解衣槃礴游心
玄澹賓客來者叩戶呼之若弗聞也性善書出入魏
晉諸家挽益奇縱或購得之輒藏去爲榮喜獎掖後
進終身不言人過其爲家未嘗問有無得俸祿及四
方餉遺輒召所善客與噉飲歌呼費盡乃已或分與
持去不遺一錢故其沒也幾無以斂云先生少有意
用世旣濩落不試一發於文雖聲實閎振猶非其志
也所著書合詩文集爲數百卷藏于家陸粲曰斯文
之用與天地準由漢氏來續言之士臻于斯極者亦

僅可數已明興百年士猶膠守章句未覩其恢然者
也乃 憲孝之際始彬彬矣祝先生由諸生起覃精
發藻橫逸踔厲超追古昔盛哉若其湛浮自得龍變
不羈大觀逍遙廓然離俗矣夏侯湛贊東方生云明
濟開豁包含弘大拔乎其萃游方之外者殆先生哉
殆先生哉先生沒以嘉靖丙戌冬十有二月二十七
日所著有祝子通若干卷祝子罪知若干卷祝子雜
若干卷蠶衣一卷浮物一卷成化間蘇材小纂若干
卷野記若干卷語怪若干卷語怪四編若干卷江海
殲求記一卷金石契一卷典寧志五卷詩文集六十
卷後集若干卷 獻徵錄卷之七十五終

焦太史編輯國朝獻徵錄卷之七十六目錄

鴻臚寺

卿

施純

楊宣

羅義

齊政

周文興

魏澆

少卿

王希孟

胡侍

寺丞

錢貴

南京鴻臚寺

卿

胡森

史朝賓

刊行

焦太史編輯國朝獻徵錄卷之七十六目錄終

焦太史編輯國朝獻徵錄卷之七十六

鴻臚寺

卿

太子少保禮部尚書掌鴻臚寺事施純傳

實錄

施純字彥厚順天府東安縣人成化丙戌進士改翰林院庶吉士初授戶科給事中陞鴻臚寺少卿再陞本寺卿純習禮度每旦侍朝爲磬折狀甚恭又諸司奏事上是之語頗澁純請以照例易之用是蒙寵眷遂擢禮部右侍郎未幾陞尚書一旦與殷謙等八

人同加太子少保成化二十一年閏四月卒年五十
無子以例賜祭葬純長身偉然出羣類表不十數年
得驟登峻秩前此所未有也

禮部左侍郎掌鴻臚寺事楊公宣墓志銘

傅珪

公諱宣字振方世爲保定新城人曾祖敬禮祖斌父
仕能俱弗仕母蘇氏公生而穎拔不羣入縣庠爲生
累舉不中選嘆曰是我造詣未至也乃抵京從內翰
淳安商公游學業大進遂領景泰癸酉鄉薦甲戌登
進士第未幾拜河南道監察御史公剛毅有氣畧每
慨然以激揚清濁爲已任 英廟復辟簡黜臧否以
更新治化公舉劾姦蠹無所避忌風裁凜然 上默
重之會鴻臚寺少卿缺吏部以請卽擢公爲之凡朝

廷宴享朝賀大禮皆出職掌公修幹美髯奏對明暢
日見寵遇自餘皆不敢望也 憲宗立以公舊臣眷
注尤篤尋陞鴻臚卿滿三載進階中憲大夫賜誥褒
封父如其官母恭人辛卯冬朝廷因災變下詔修省
時荆襄叛寇劉千斤者既伏誅戎帥械繫餘黨獻俘
於京屬官引奏公詢知徒衆有誤陷於辜者亟上章
論救大要欲重人命謹天戒辭甚婉切有 詔法曹
詳鞫以聞竟得矜宥論者服公之見云滿九載陞禮
部左侍郎仍掌寺事越二載卽上疏乞休既歸日與
鄉舊酌酒賦詩爲樂優游林下垂二十年而卒寔弘
治丁巳十月九日也距生洪熙乙巳六月二十九日
春秋七十有三公爲人端慤謹密居家孝友處族黨
惇睦待人一以誠所與交無不意滿者立朝號得君
公亦克自勤恪雖大寒暑風雨未嘗一日闕朝前後
蒙賞賚甚多若 御製連環詩一統志通鑑諸書之
賜尤殊恩也計聞 今上遣官諭祭復 命有司營
葬事於平公所遭亦可謂不偶矣

鴻臚卿羅義傳

郡志

羅義山西清遠衛戍卒也革朝加兵潛邸義詣闕上書乞息兵講和又上潛邸書略曰昔日武王崩成王幼周公叔父也而輔相焉管叔流言以間王室周公誅之殿下聰明英武博通經史今之周公也宜以周公之心爲心謹守燕土則天下皆以爲周公之聖復生於今日矣又謂古之夷齊以國相讓去隱於首陽山矧聖賢欲成天下之事必先明逆順之理成敗之勢禍福之機又得天道之宜人心之安然後可殿下以藩國敵朝廷如遂其願臣實羞之書上忤旨下獄

文皇卽位義歸附以爲戶科給事中陞湖廣布政
司左叅議代左叅議楊砥入爲鴻臚寺卿建文時砥
常上書請敦親睦罷兵息民云

鴻臚寺卿大同齊公政墓志銘 徐溥

公諱政字以德姓齊氏世家雲中少卽穎異入郡庠
爲弟子員學業迥出儕輩永樂丁酉試於鄉中式明
年會試辭乙榜卒業大學宣德丙午吏部從太學諸
生選爲鴻臚寺序班公在選中或謂公且登科甲公
曰此古九賓之職也懼不能稱耳卒就職己酉改鳴
贊正統丙辰九載考最擢本寺主簿仍專鳴贊事己
而連遭父母喪服闋復任己巳擢寺丞景泰壬申再
擢右少卿天順丁丑 英宗睿皇帝光復寶位知公
練達特擢本寺卿居四年以衰老乞致仕 上優詔

留之又四年再以為請詔特令歸展墓 今上嗣位之初公年已七十有七請休致不已始賜俞允既歸二年為成化丁亥十二月十二日以疾終於正寢計聞 上遣官諭祭以明年某月某日葬於大同縣長安村之先塋公為人體質魁梧音吐洪亮日侍廷陛而禮制習熟動無所失及年既邁恭謹愈甚故累朝特寵眷之遂以諸生至九卿可謂嘉遇也已

鴻臚寺卿江郎周先生文興傳 趙 鏜

浙中
如錢
八山
周江
郎故
是物
外人

江郎先生者江山鳳林里人也生而穎慧丰姿瀟灑自幼時即慕李泌之為人有異僧見而奇之曰此子風骨不凡當是神仙中人但恐世情牽染為顯官則無望矣其家聞其言強為博士弟子員從遊章楓山先生門先生一見其文許以決科曰是無煙火氣者遂舉正德丁卯鄉試第四人次年舉進士高等即乞致仕不允乃以疾告遍遊海內名山凡太華終南衡嶽匡廬遊覽殆遍歸丁內艱服闋起授比部主事尋復以憂歸築室於江郎之鐘鼓洞終日端坐觀心定

性若將終身焉嘉靖改元奉部檄補禮部祠祭仍乞
休不允告改南尋轉稽勲郎中屢轉至鴻臚正卿卽
乞致仕歸寓居府城晚年移居武林徜徉湖山日與
高僧異人爲方外交藩臬諸公慕其風者咸願出門
下侍御邢臺趙公玉泉扁其所居曰嵩寓總制胡公
梅林巡撫阮公山峰爲造高士堂以居焉先生周姓
諱文興字用賓嘗居江郎山故因以爲號年八十二
無子終於武林云論曰先生平生不喜著述亦不作
應酬文字而於道經釋典則深裁其味中年頂上結
一虎令人大棒槌之不知痛人以爲丹成之驗故信
從者衆或曰昔人謂康節別是一般聖人若先生者
其不別是一般人品與余每謁先生見其丰神器度
真有振衣千仞之風令人鄙吝不覺都消或者之論
其然哉其然哉

鴻臚寺卿魏澆傳

魏澆直隸合肥人羽林衛籍正德戊辰進士六年任鴻臚寺左少卿十五年九年考滿陞本寺卿初通事缺人見在通事假訪保名橫行求索視利輕重爲出入嘉靖元年澆疏其弊凡選補各國通事除了憂緣事俱不作缺其見缺十人以上及一國全缺者在外行各邊鎮巡每缺精選一人送部在京不必通行通

議選
補通
事

事訪保禮部劄鴻臚寺召選真正籍貫子弟取具印信保結粘送部覆審相同再試每缺精選一人奏送該寺分派各國年深老成通事教習如本國無人許

其自從師受業或隣邦通曉者教之一年之後同邊
方訪保到部之人通行試以夷語上者收補次者候
缺下者黜還不得稱守候多年以濫收選時勘結人
員不得以過犯頂冒之人竄入著爲令禮部覆議
詔從之歷太常寺卿掌鴻臚寺事

鴻臚少卿王公希孟墓碑

予平生有雄傑友曰獲嘉王宗哲云宗哲諱希孟號
淇東貌肥黑而健力性敏而耻自屈推事陳義已雖
未悉得他人稍啟其端卽娓娓談多奇悟弘治戊午
同予舉河南鄉試乙丑同第進士已值 武皇卽位
出令唐山更賢改邢臺逆瑾方竊弄國政闞使謀校
旁午下郡縣大索賄少不厭欲中以法大者械首廷
笞次削秩遠竄吏日惟辦茲亦乘隙自潤上官諒其
艱不深咎宗哲廉白自將盡力民事又善斷決無滯
務守郭維潔修有稱宗哲勞而病守憂自來視求他

醫診治三載晉刑部主事正德庚午秋八月闔張永
害瑾權奏瑾大惡詔多官廷鞫皆錯錯索索莫敢先
發言衆促司寇乃問瑾胡爲引用鄉人瑾笑乃罵曰
汝文武大臣皆由我進何得言鄉人衆皆習息駙馬
蔡震詰瑾考掠成獄震武人齷齪無所長一旦名聲
遍朝廷法官推宗哲謹獄詞慷慨亢朗聽者竦然由
是銓司器之太宰楊邃庵選授鴻臚少卿前未有超
級如此者邃庵方以折體越用招士出其門士亦樂
比附宗哲僅隨衆投名狀迄宰邃去位未嘗登其私
堂交一言乙亥七月二十三日以疾卒生成化乙未

八月十一日享年纔四十有一宗哲負氣忤物面數
人過失指其隱弗恤人不能堪能因而改者極與厚
善好強飲醉更浮白坐是得蠱病予與何仲默日候
之疾革自恨業不遂擊膺念厲旣卒予與仲默仍請
費於鄉士夫及他厚宗哲者乃得棺斂馬柳泉敬臣
守大名助之葬云

鴻臚寺右少卿胡公侍墓志銘

許宗魯

公姓胡氏諱侍字承之別號蒙谿應天府溧陽縣人也國初諱士真者明醫術坐累謫戍陝寧夏衛歷四世皆爲寧夏人司馬公卒賜葬陝西咸寧縣韋曲得守冢墓遂爲韋曲里人公少治書爲縣學生正德癸酉舉鄉試丁丑舉進士戊寅授刑部雲南司主事辛巳晉廣東司員外郎嘉靖壬午晉鴻臚寺右少卿甲申謫補山西潞州同知乙酉下詔獄事白奪秩編民戊戌詔復其官癸丑十二月四日考終於家距生弘治壬子十一月六日得年六十有二明年

甲寅十一月四日祔葬司馬公墓次所著有蒙谿集
三卷續集一卷墅談二卷真珠船二卷清涼經一卷
傳之於世右狀所載如此云維公靈炳肇生粹敏夙
賦垂髫穎慧族稱豹變之資弱冠敷揚鄉譽鳳輝之
覽逮過庭之服習遂遊泮以翱翔胞羅星斗之文落
筆而煙雲滿紙腹蘊經史之奧縱談而古今懸河首
薦鄉書省推額雋繼登廷對朝慶得賢仕始白雲著
火雷之剛決明垂黑索並日月之靈融式慰勤而折
獄以情體欽恤而求生於殺淮南密網解三面而仁
活千人定國高門赦五刑而慶延百世陟卿禮寺佐

肅朝章寅恭贊導乎一日司軌度儀刑乎四裔瞻天咫
尺身依斧展之榮捧日周旋晉接 冕旒之責叔孫
制禮體統正而朝廷尊公西立朝應對諧而賓客悅
無何崇祀議興囉言訟聚公乃橘性不化荼苦遂罹
賈誼少年自速長沙之責子牟忠悃常勤魏闕之懷
方內咎以圖新忽外尤而作戾紛馳錦貝組織無端
載錮園徃控白何所公惟究心義畫誦言臣罪當誅
絕念鄒書仰恃 皇明有赫旣而大地生春恩深玉
律覆盆回照德沛金雞沐雨露之鴻私放山林而獸
逸於是瘁躬畎畝畢志典墳三農旣隙頌至仁於擊

壤之歌四部窮探揖往聖於羹墻之接謝靈運放情
自適賦登山臨水以徜徉邵堯夫知命樂天咏月霽
風光而爾雅貧無儋石之蓄樂且有餘富有貫斗之
才學如不及雖古人三冬之苦八斗之雄方之恐不
能前也故其著述精研搜羅極至秦封孔壁了無遺
文汲冢湯盤倏興雅道謂爲詞林之宗匠學海之鉅
儒蓋無忝焉而又天畀純孝性篤友恭敦彼彝倫慎
茲庸行執喪則毀瘠越制侍養則色志無違昆季念
孔懷之休妻子翕好合之美生年華胄不染統絻之
風流投老窮居克厲貞松之志操古云居養易習亨

困移人可無其咎矣公器度深沈識見警捷剖紛刺
劇不假盡詞應變持危有同素晝而乃禁不迄用卷
以退終嗚呼傷哉魯也托葬於公自髻伊始何天不
弔隕我良朋感交道之始終慨斯文之凋喪爰製韻
語慰公於幽

鴻臚寺寺丞錢君貴墓志銘

文徵明

嘉靖甲申錢君元抑以鴻臚丞致仕還長洲閱六年
庚寅三月四日卒年五十有九君諱貴字元抑姓錢
氏吳越武肅王之後宋有寶文閣學士諱端問者卒
官平江遂家長洲漕湖之上君曾祖琬祖迪父腴世
有隱德而腴尤業儒有聞以君貴累贈文林郎太常
寺典簿母陸氏贈安人君生穎異數歲聞父讀史從
傍諦聽若領解者問之卽能以意對父大奇之授以
家學年十六選隸學官始從師習舉子業不數月悉
通其義御史按試輒占高等弘治戊午中應天府鄉

試益淬勵精進期取甲科既而試禮部數不中而其
名日益起從遊者日衆君質義演推必盡底裏又爲
游揚引重使皆有聞一時學者咸親附之正德辛巳
以太學生試吏部入格授太常寺典簿時方用羽流
爲太常卿少君上言秩宗之用典司禮樂統和神人
職重位尊不宜以異端參列其中又言太監蕭敬饗
陂懷讓屢遭論劾不宜在 上左右又集姦璫王振
曹吉祥劉瑾事著三患傳上之時 上新卽位中官
有用事之漸君言隱然有所指陳人咸避之會有事
與獻帝園陵君奉詔副大臣往治禮儀禮成復命賜

三患傳是劉公定之

及追崇議起君因論邊豆之數乘間有

言列或謂非所宜言君曰吾職司事既有知不敢
不以聞禍福非所計也在太常執事節適多所建正
而操廉履慎莫或過舉既舉最當遷而君雅有歸志
遂上疏乞骸骨 朝廷以年未及不許疏再上乃進
今官以榮其歸

南京鴻臚寺卿胡公森墓志銘 應廷育

公胡姓諱森字秀夫別號未齋自幼英特迥邁不凡
大父期公碩器幼齡送入黌宮博究羣書爲文雋拔
領正德丙子鄉薦丁丑魁太學試庚辰中式禮闈越
辛巳 上首策多士賜公進士出身初授南京刑部
河南司主事繼陟本部陝西司員外郎更廣西司明
察廉平寬惠信決平富民沈氏之訟父子兄弟咸輸
其情聽訟之中教化行焉察鑄錢之私併得假官之
狀請託之杜摘伏神焉告謁月餘則部案累積視事
一日則囹圄幾空逮繫之釋數百皆呼青天而去繁

劇之理有仁恕焉不激不隨有學有守心存愷悌而
讞獄本於平恕志向高遠而自處拔乎流俗則見於
部堂季襄惠公之薦遂有吏部稽勲司署郎中之擢
歲在戊子率士來賓大明黜陟實難其選朝論僉同
陞公考功郎中公廣詢博訪誓心秉公於時大禮著
爲成典矢議諸臣皆就外補執政欲追前尤公爲從
容回幹士類藉以保全太僕卿楊公最時爲寧波守
以剛方忤部使被論公獨諒其不阿爲之解釋覆奏
卒以忠諫顯有省憲長等在議黜例首相欲私庇之
公竟黜之不少貸考績事竣歷轉文選司郎中明揚

側陋惟其賢不惟其類碎引善類士途爲之一清斥
罷貪庸首相爲之莫挽冢宰渭涯霍公疏可證也會
陞南京太常寺少卿時有祀典明禋之疏以求無愧
於天理民彝之極其署光祿之印革厨役之濫輸省
麩孽之冗費却署官之餘金不以非專職而不事事
癸巳之秋北補太常少卿提督翰林院四夷館官階
清要士民傾心無何公妣王恭人卒以內艱去任扶
柩歸葬結廬墓側哀禮備至服闋煢煢在疚四期始
起赴京又以靳於請謁忤首相補南京鴻臚寺卿公
以局閑事省減去直役時與渭涯霍公泰泉黃公東

郭鄒公泉亭吳公談說理學講明國是以需大用
皇上克謹天威因遇災異許令自陳三疏乞休遂得
請家食宰相尋亦被論去無幾召復相舟停潑溪請
見公輒稱病不往嗣後內外交薦皆不報繼其相者
公南官邸舊比鄰也厥子竊柄遂不與通尺楮大中
丞歐陽公必進雖有特疏之薦而公高尚之志於此
決矣厥後二相果不令終人由是服公之先見躬飭
粥調藥餌養封君中憲公又十餘年壽躋大耋而卒
公年亦邁其哀慟居廬動必如禮營墓建祠皆親課
弗懈又聿追前季家廟之在青陽者皆修葺而拓其
基焉餘惟杜門九峰韜養自晦優游林下者凡二十
餘年而卒

南京鴻臚寺卿觀吾史君朝賓墓志銘

袁洪愈

余讀楊忠愍傳容嗟憤懣法然涕泣不得傳刃姦兇
腹中以為恨 世廟雖御臣嚴未始不謀於輔臣如
徐文貞調護海君瑞上怒甚卒得解忠愍之見殺嚴
氏力為之也佐賊者仇賊所撼曲法蔑理孰知有忠
臣孰知有國家良心亡無所不至亦鄙夫恒情於時
以下僚抗上官執辭曰不可雖弗獲竟其志豈不亦
難哉觀吾史君所以無愧於人其行可述其墓可銘
也已按狀嚴氏嵩之欲殺忠愍也授指刑部侍郎王

學益文致其罪史君適以山東司員外郎署司事論
辨終日曰繼盛何罪也王知不可奪自爲律案以詐
傳親王令旨律藁成授司令署銜君痛心疾首無如
之何乃自署疏尾有揚繼盛語雖註誤心實無他惟
復 陛下憫其狂愚請發遠戍以全好生之德等語
疏入嵩怒揚坐歿而君則降職調外矣君雖左遷聲
譽自此勃勃起由泰州判官陞揚州府通判陞南京
戶部員外尋陞郎中丁母憂服闋補工部郎中管張
秋陞河南僉事陞尚寶少卿陞南大理寺丞應天府
丞南鴻臚寺卿時文貞爲元輔方欲大用君未幾而
君逝矣君以正德庚午四月二十九日生以隆慶辛
未十月初三日卒卒十有六年爲 今上萬曆

歲余始誌其墓中之石君姓史氏諱朝賓字應之別
號觀吾其先浙之四明人元至正中有禡者避地入
晉江遂爲晉江人禡生元吉元吉生惠有孝行 詔
旌其門以長子盛貴封戶部郎中惠生隲隲生時泰
時泰生商喏公宏璉任金壇訓導贈鴻臚卿君之父
也母包氏封太宜人贈太恭人君以嘉靖辛卯薦於
鄉爲第 人丁未試春官爲南宇高公所錄第一人
試於 廷爲二甲第四人君雅尚澹泊簡約耻爲時

俗麗態自宦所歸儻居僧寺舍車而徒宛然寒素士也孝友忠信不而躬行居官奉法循理節冗費恤民隱卻餽遺雪所至著績薦於端簡鄭公曉曰表裏無間夷險一於蔡巡撫汝楠林宗伯濂曰不飲大梁一滴水曰聽言若呐呐不出口而胸中膽略有萬夫莫當之勇余嘗與君共事留都蓋親覩記其議論猷爲真有道氣象前輩風流不可及也詔賜論祭鄉推賢祠君沒有餘榮焉而諸子皆彬彬守其窶貧而厲志進修福澤綿綿蓋未有涯也君嘗集自古父子兄弟言行可法者爲史氏內範行於家

又行畧

弟朝富

堂 肅皇帝癸丑之春楊椒山公繼盛以兵部郎上疏極言嚴氏納賂蠹國十事疏中有引二王語 上大怒命杖之百下司寇獄舉朝皇皇時余伯兄觀吾以員外郎署司事部堂則 何公也問當擬何律觀吾答以奏事不以實當用此律堂翁曰更有一律可用汝試尋之次日復翁曰以員外見只有此律它無可傳者翁乃指詐傳王旨一條謂用此何如觀吾爭不可時急矣延數日獄未上堂翁乃曰汝執誠是然 聖怒不測與其俱斃無益不若姑狗 上意以

待後解左堂王者嚴氏姻人也則曰司官欲徇名姑
饒我老命於是改擬詐傳王旨絞藁成授司令署銜
尤痛憤既不可奈何乃自署本末云楊某言雖註誤
心實無他惟復 陛下憫其狂愚謫發遠戍以全好
生之德數語及疏入相嵩怒楊坐歿司官降三級調
外任堂上官罰俸三月方嚴氏勢焰士大夫相見以
日不敢言及椒山事同年提牢者至一黑羊不許入
諸相問者椒山俱閉目不言獨觀吾至則張目視曰
史年兄耶多費心矣兄瀕行與楊書曰遇翁之事當
以歿諍寘不歿者尤冀翁之不歿也帶罪出門望翁

首愛明明者天庶幾一悟楊復書曰批奸人腸誓不
俱生自分必歿翁何苦也翁行矣天下事尚可爲珍
重珍重手書至今存調任之後達官貴人見皆噴噴
慰勞至見次相李南梁公未及廳遙指曰此真勇兒
也遂降階延入慰藉尤至今縉紳大夫不惟不知觀
吾事并揚椒山亦或惘然王鳳洲爲楊立傳僅及郎
史君不詳其實而且沒其名可惜也余觀今之巧於
取名者稍建一言著一節曉曉以名節自負人亦爭
以名歸之雖一時遭抑旋即償之因而負重望躋膺
仕若觀吾者一遭譴謫蕭然一州幕赴任上官無物

色之者三年盡瘁供職竟不得一引薦富時觀吏部
政楊武東公掌選以風裁自持欲收拾天下人才道
及將處之一京職以嚴氏意未解量移揚州通判及
李古冲公位冢宰李素知觀吾者乃稍遷南戶部郎
嚴氏敗諸爲所擠斥者俱蒙賜還觀吾復以河南僉
憲轉尚寶卿尋丞大理駸駸向用矣竟以無書抵政
府留滯南都終於鴻臚散卿以沒嗚呼此誠拙之效
其視今之巧於取名者何如也

中憲大夫南京鴻臚寺卿張公朝瑞墓表

焦竑

萬曆辛卯鳳梧張公以金華守入覲太宰陸荊簡公
負人倫鑒擇計吏卓異者六人請旌之公與焉當是
時公廉直之聲天下莫不聞余意公必矯然有以自
異者久之與公遊益闇然篤行君子也嗟乎吏不受
賕常耳而世輒以自矜詡訑訑見於顏面宜其一節
之鮮終而又何以論於其大余以是歎莊簡之知人
而公之賢爲不可及已公年六十有八以癸卯二月
十一日卒明年冬十月二十六日諸子將葬公州孔

望山之原而屬表其墓余惡能辭公諱朝瑞字子禎
生敏而恪五歲知字義十三入州校嘉靖辛酉舉應
天鄉試隆慶戊辰舉進士屬州有倭警議築城公卽
捐坊金爲倡釋褐令安丘臺使者以治蹟交上未幾
丁外內艱歸服闋補鹿邑令公至益自發舒賦溢額
蠲之士蕪蔓不理闢之集流移舉鄉約嚴什伍大要
以惠元元過姦宄爲急邑疆半侵於衛人民苦虛賦
公履畝以覈復侵地七千餘頃於是公聲稱奕然著
三輔間矣以令高第徵次當補給事中御史而時相
銜公著書有所刺譏僅遷南行人司副已轉計部員
外郎晉郎中凡鈔關板關之役以膏脂名者力辭不
行時時典衣稱貸爲朝夕費至事關大體則不憚悉
心以籌大司農倚重焉出守金華爲儲胥其民而祗
席之甚具會歲饑穀涌公出帑金貴糶而平糶活饑
民以百萬計郡故有先賢祠日圯公葺之更拓爲書
院置田二千餘畝延師儒貯載籍以教語具崇正書
院志中遷濟南兵使者兼治河時有議鑿性義嶺者
公相度川原謂鑿空而勞數十萬人之力損大司農
金錢非便慨然建議有三當謀八可已二可患之說
與總河大臣意忤杜門求去因調金衢而總河糜度

支水衡錢無算功卒不就朝論翕然多公居無何湖
中民變起上下囂然復假公叅知以填之公居湖黜
貪殘吏壹以清靜爲治若義倉義冢善政具舉而止
曠一疏先諸司爲民請命貂璫卒詘于輿論者本公
首倡方也召爲南京兆丞再遷鴻臚寺卿會黃河西
徙漕綱爲梗公以分淮導黃爲非策抗疏極論之大
旨塞黃壩口復徐邳故河謂黃壩口不塞則徐呂
水不流江南四百萬漕艘無入京之路疏入主計者
警夷莫決公引疾乞骸兩奉 旨慰留給由復職攝
南京兆公再蒞事風清弊絕民以牧寧念士貧無資

前爲置田者婁矣至是爲鈞陳牘摻伏匿得五百金
益買良田以贍之如在郡邑時貢院之前築避雨舍
徙甓治衢不欲以霑體塗足爲多士患也京兆有表
忠祠祀遜國諸臣公以爲未備檢括史志增至六十
餘人主成躬奉以入且輯忠節錄一編以垂久遠其
加意風教類如此累推光祿太常卿 命未下疾作
一日端坐而瞑惜哉公仕旣通顯敝衣糲食終身不
厭故廬湫隘不蔽風雨卒之日筭無遺金賴南中好
義者奔賻始克成殮夫世號潔廉者如建鼓而求以
子惟畏人之不知也自非然者或硜硜堅瓠無當縣

官用公廉而不伐業與沾沾自喜者異矣其臨民泣
政殫竭心力至日不暇給或遇國家大計意氣激發
侃侃亾所避雖賁育莫能奪也公氣色恬穆鮮所見
喜怒乃至違上守已奇禍不折危議不搖殆庶幾社
稷臣之風而廉吏不足以槩公矣平生面目嚴冷交
游間正色直言不作寒暄語數歷三十年不以竿牘
一通於津要以此自立亦以此不合於時然公亾悔
也事伊湖公色養備至又廣其意作族譜九卷附名
賢家訓于末創祠堂義田義學收族之貧者而養以
正復推其羸於周親間黨咸被焉昔范文正身無以

爲敏子無以爲喪而盡其力於施貧活族間如公之
所爲何必古人嗚呼難已公淮安海州人考諱景卽
伊湖公累贈中憲大夫南京鴻臚寺卿嫡母孟氏繼
王氏生母鍾氏俱累贈恭人配葛氏累封恭人子三
人應濯應泰應濬皆諸生孫一人所著三集外有孔
門傳道錄禹貢本末皇明貢舉考南國賢書宋登科
錄鹿邑縣括地志兩邑節愛錄金華荒政鄒魯水利
常平倉紀奏疏文集總若干卷公旣歿都人士思之
不置謂公清畏人知如胡威愛而能誨如子產爭傳
誦之猶若未悉其美也中丞耿公定力奉常丁公賓

給諫祝公世祿擬具公事行請贈謚于朝未果余故
忝史職有善而不彰罪也爰擬其大都表於墓俟諸
君子以次而舉焉



